



STINAPA TA INFORMA

ESPESIENAN EKSOTIKO DEN KULTURA BONERIANO (Parti II)

Di 4 artíkulo tokante eliminashon i kontròl di espesienan eksótiko den Parke Nashonal Washington Slagbaai. Ta inevitabel, konsiderando nos sintimentu humano, ku nos ta desaroyá sintimentu pa bestia mansu i bestia di kas. Esaki a sosodé den tur kultura for di tur tempu. Tin biaha asta a bai asina leu ku tabata adorá figuranan di bestia komo diosnan pasobra nan tabata ser asosiá ku nos sintimentunan mas básiko. Djis wak por ehèmpel e diosnan di e Egipsionan. Bonerianonan tambe tabata haña sintimentunan pa e animalnan ku nan tabata rondoná nan mes kuné. Kabritunan a nifiká kuminda pa hopi generashon di Boneriano. Mayoría di hende lokal ta sumamente sorprendí ora ku nan tende ku kabritu ta un espezie di animal eksótiko ku no ta pertenesé den naturalesa di Boneiru. Tin di nan ku ta nenga di kere, i esei ta komprendibel pasobra mayoría di hende a lanta ku e animalnan aki den nan serkania direkto, tantu den mondi komo rònt di nan kas i den nan kunuku. Si semper bo tabata rondoná dor di algu i bo mayornan i abuelonan semper ta konta storia igual, ta hopi lógiko pa asumí ku semper e kos ei tabat'ei. Buriku tin un lugá importante den e kultura boneriano. I esei no por ta un sorpresa si bo sa ku burikunan tabata indispensabel den konstrukshon i desaroyo di e isla den e último 300 aña. E buriku ta un animal inteligente i noble i ta traha duru i komo tal fásilmente por drenta un hende su kurason. Den esei nan parse kachó. Nos Bonerianonan mester ta agradesido pa tur lokual e espezie aki a hasi pa desaroyo di nos isla den tempu di plantashinan. P'esei nos mester tuma desishonnan responsabel i ku respèt si nos ke protehá nos naturalesa i nos medioambiente. Tambe mester evitá sufrimentu innesesario. Hopi otro espezie manera pushi i kachó a haña nan lugá den kurason di hende. Pero esaki no mag di apstené nos di aktua responsabel ora ku a yega ora di protehá nos alrededor. Nos mester drecha e balanse i nos mester hasié na e manera mas humano. Esei kemen ku nos mester respetá e derechonan di animalnan. Tambe nos mester wak ta kon ta evitá sufrimentu i krueldat kontra animal. *Skirbi pa Fernando Simal.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru